

**Zeitschrift:** Historischer Kalender, oder, Der hinkende Bot  
**Band:** 288 (2015)

**Artikel:** Fürsprützemuschterig  
**Autor:** Bürki, Jakob  
**DOI:** <https://doi.org/10.5169/seals-656759>

#### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Siehe Rechtliche Hinweise.

#### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. Voir Informations légales.

#### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. See Legal notice.

**Download PDF:** 21.05.2025

**ETH-Bibliothek Zürich, E-Periodica, <https://www.e-periodica.ch>**

## Füürsprützemuschterig

«Tüünerlischies doch ömel o», balget Bode-Chlous, der Gmeindamme vo Gnürrige, wo är un äs, ds Annelisi, sy schwäreri Hälfti, von ere guet ggratne Fäärlte dänne ume dür ds Söigängli füre un über d Bsetzi gäg der Chuchi zue trappe, «Chätzerliwätterli, jitz hätt i di Sprützemuschterig vo hütt namittag mytüüri vergässe, we mer nid äbe vori ab em Fäärlie dervo hätte bbrichtet, wi albe d Söi, we Füür ufgange isch u me se het zum Stall uus gschrisse, schnuerstracks ume dry rochle, für ga z verbrönne.»

«Füürsprützemuschterig? – Öppis Narrs eso!», balget jitz o Annelisi, u blybt stah u streckt d Füüscht i d Syte u stellt d Ellböge wi Chometschythörner ussertsi. «Sprützemuschterig? – Scho ume? – U heit doch ersch färn eini gha! – U de no waas für eini! – Potz! – Alli drü Sprützli vo der ganze Gmein wäre nid imstang gsi, die Bränd all z lösche, wo der sälb Namittag u Aabe i der Wirtschaft sy gleit worde! – U hütt söll di Hudlete scho ume losgah! – U der Gstaat befilt so settigs! Zwöimal im Jahr für nüüt, ohni dass es brönnt, ga d Sprütze füreschrysse, u d Schlüüch u d Eimer, u alls versoue! – U Plöder suuffe, dass si no zmornderisch nid ume möge näuechter wärde! – Nanisgwüss, es isch nume afe guet, dass üzers Mannevöchl dert düre zur Sältsemi einisch so gschyd isch u di Rochlete nume einisch aastellt im Jahr, anstatt zwuri, wi's befole isch. – Doch ömel o gschyder weder der Gstaat, vowitz der Gstaat isch da düre eifach e Lööl!»

U dermit macht's ganzi Wändig, schnützt zur Chuchi y un i ds Stüblu hingere, dert ga der Spycherschlüssel abhäiche näb em Zythsüli, u schnaulet im Zruggcho zu Mädin, der Jumpfere, si müessi däich hütt es Hammli ubertue u Suurchabis, für toll z ungerlege, Bänz wärd

däich o müesse ga hälfe d Sprütze drücke u Chrigi mit em Eimer ga Wasser göitsche. U de, we's fähle sött mit ne uf d Nacht, so heige si ömel de öppis Rächts fürezgä u müesse de nid läär büüre, dass sech üserein uf alls ueche no sött schiniere u sech la nahrede, me gönni syne Lüte d Sach nid, u si heige nume Mählbrei oder Bitzli by sech gha.

Chlousen isch die Muschterig o zwider gsi, un er het süüferli innerti bbalget, es trag ja gwüss nüüt ab, e settige Miraggel ga aazstelle u sövli Lüt derzue ufzbiete, die im Dörfli u die vo der Schattsyte nache u äiner vom Bärg obenache; alls, Bure u Chnächte u Tauner u Ghusme u der Schuelmeischter, alls mües derwäge ne halbe Tag versuume u zsäges no ne ganzi Nacht derzue, nume für echly mit de Sprützli dür ds Dörfli uus z chessle u z horne u schliesslech no es paar Zysse Wasser a ds Schuelhuus ueche, u we's guet geit, o no chly ubers Dach y z sprütze.

«Aber was wott me, we si's ja so wei ha z Bärn usse? U der früscht Brandmeischter isch – mytüüri glouben i's – o eine vo de nöimödische u meint, me sött fürthii no viil meh Flyss ha i dere Sach u di Füürverordnete zum mingschte ömel o zwöimal im Jahr la zämecho, für se z trülle.»

So het er für sech sälber gmütteret u isch zum Schopf zue trappet, Chargin ga rüeffe, er mües ihm cho hälfe, da di Redli ab der Bänne näh, es syge drum di hingere vo der Füürsprütze, u me mangleti se däich ume ga draztue, gob d Muschterig aagang, süsch chönnt wi liecht de no gmugglet wärde, we si nid dranne wäre u si de zu Mösl-Samin näbezueche für dä Namittag es Paar angeri müesste ga etlehne.

So hei si also die Redli abprotzt u se uf enes Stossbährli gheit, u Chrigeli het mit ne müesse abfahre gäg em Sprützehüsli zue.

«La de ds Bährli nume grad bi Möslers im Schöpfli stah», brüelet ihm Chlous nache, «du chasch di Redli morn de ga umereiche, mir mangleti se drum de öppe z bruuche, für Härd z füere im Strüssler äne!»

U dermit gnept er über d Chuchischwelle yche u seit im Verbygang zu Annelisin, wo afe grad der Suurchabis i Chochhafe zatteret zum Schweize, he nu, es syg doch ömel o wahr, sünd u schad wär's, di Sprützeredli jahruus u -y unbruucht im Sprützehüsi la z stah! Brönne tüei's ja doch nid, si heige in ihrer Gmein drum gar guet Sorg zu Füür u Liecht, u we me ne Sach nüüt heig z bruuche, so hätt me ja chönne d Chöschte spare derfür. Der Bänz am Egge heig ömel a der letschte Gmeinsversammlig o gseit, es syg öppis Dumms, e Füürweier la z mache, me wüs ja nid, gob me ne einisch chönn bruuche oder nid, u we me jitz eine miech, so wär me vilicht scho i zäche Jahr röjig derwäge, we me ne ungerwyle nüüt bbruucht hätt, u sieg de, me hätt ds Gäld chönne spare oder druus öppis Gschyders aaschaffe.

Ytem, di Sprützemuschterig isch ömel du sälbt Namittag vor sech ggange u het e Verlouf gno, wi me sech bis dahii gäng isch gwanet gsi.

Am eis het's sölle losgah im Dörfli, uf Löie-wirts Husmatte.

Die erschte, wo sy cho z schlaarpe, hei i dr Gaschtstube inne afe eis gno ufe Zang, vowäge we me wott lösche, so muess me bizyte aafädermit u der Brand scho grad im Aafangsstadium bekämpfe.

Dernah het me afe ds Sprützhüsi ufta mit Löie-Liebus Schlüssel, u di lääre Stroufläsche u Schnapsfessli, wo dert vor em Sprützli zueche gstange sy, süüferli näbe ds Hüttli hingere gestellt, u nachär Bode-Chlouses Redli aata, d Sprütze füregschrisse u d Müüse- u Rattenäschter drusputzt.

U gfelligerwys het di Dörflermannschaft grad no so häbchläb möge bcho, für se i d Löiematte ubere z stelle, gob d Schattesytler u d Bärgler mit ihrne Gugerli sy aagrückt, süssch hätt's de ume gheisse – wi früecher scho so mängisch –, die wytischte müesse gäng die erschte sy.

Mit Schyn hei dasmal d Schattesytler bir Tagheiteri ds rächte Fuerwärchli verwütscht i Hü-



Da hätten die «Gnürriger» gestaunt! (Foto: 118 swissfire.ch)

belers Schopf, wo si ihres Sprützli ds Jahr uus gstellat hei, u sy nid ume mit em Bschtüttichäschtl cho z chessle wi sälbisch, wo's im Schlatt hinger het Füürlärme ggä u si du i der Fyschteri u Schwadligi d Ross a d Bschtüttigut-sche aagspannet hei.

Aber am gäbigschte sy d Bärgler mit ihrem Druckli dranne gsi. Viil Platz verschlage het es ne nid, drum hei si's ds Jahr düre imene alte Fueterchaschte chönne beherbärge, wo si einisch anere Steigerig wohlfeil hei chönne ergattere.

U hei si müesseusrücke dermit, so het se das Fergge o nid starch plaget. Uf guetem Wäg hei's ihrere zwee ganz gäbig möge zie, u isch's über ne Grabe ubere ggange oder süssch amene Ort, wo nid isch gwäget gsi u bös dürezcho, so hei si uf jedere Syte vom Sprützli es Tragstangli dür d Schlängge gstoosse u's treit wi nes Bschtüttibocki. Oder der Sterchscht vo ne het's eifach uf enes Räf ufbbunge u's a Buggel gno u isch vorewägg gschuenet dermit.

Wo gäge de zwöine du di meischi Mannschaft isch ygrückt gsi u i «Löie» ubere isch Bricht gschickt worde, wär no dert hocki, soll

ustreiche u cho, het's du gheisse, me sött däich drahii, es wär Zyt, dass me aafiegt.

Der Brandmeischter isch ufe «Löie»-Mischt-huuffe uechegstange u het us em Füürrodel Appäll gmacht, u dernah het's gheisse: «So, jitz Sprütze in Aktion!» E Stung heige si Zyt, si sölle sech rangschiere u schicke, dass es öppen echly schneidig gang u nüüschi nüüt verpfudret u vercheibet wärd, är gang de derwyle ga luege für nes Brandobjäkt, si müesse de no cho Wasser gä, aber er wüssi jitz no nid wo.

«Oh, däich öppe ume bim Schuelhuus, wi no jedes Jahr – wo ächt süsch!», het's bi de Sprützedrücker gheisse.

U richtig, d Stung isch no nid ganz ume gsi, so isch Bricht cho, ds Schuelhuus brönni, u der Füürlöifer isch dür ds Dörfl uus trabet, ds Hörnli am Muul, u het dry bblase u ddrückt u Pfuisibacke gmacht u gstileti Ouge, aber kes Töneli het er usebbracht, gäb win er aagwängt het.

Bärger Chrigel het ihm drum im «Löie» hinger em Tisch e Pantoffelzapfe dry gstonesse gha, u so het dä Hörnlimaa müesse abgä u isch verdrüssige, aber uf ene Wág doch o froh, umen i «Löie» yche ghocket, sys Tütlili ga ufgschwal-le.

Aber die Manne uf der Löiematte hei wäge dessi notti gwüsst was gattigs u was si z tü hei. Es het ja no jedes Jahr im Schuelhuus bbrönnt gha, wil dert vom Bach dänne di läde-ri ge Schlüüch grad no so gäbig hei möge über ds Strässli ubere grecke, für bis ubers Dach y chönne z sprütze. U d Bärgler hei mit ihrem Tragbocki ohni Schlüüch, nume mit em aagschrubte Wändrohr, o grad prezys no bis zu

Schuelmeischters Söiställeli möge bysle, we si rächt gchraftet hei.

So isch also jitz di ganzi Rochlete dür ds Dörfl uus gchesslet un uf di alti Schuelhütte zdorf, u hei se gsprützt u gwässeret, dass dä arm Schueli o dasmal ume der gross Parisol het müesse über ds Bett uffspanne udürhar i syr Wonig ume Chessle u Chachle u Hinechhäfe ungerstelle, wo nes vom Eschtrig achebbrünelet het.

Mit dere währschafte Wässerete isch du der offiziell Teil vo der Muschterig abta gsi, u der Houptakt im «Löie» het chönne aagla wärde.

Dert isch du richtig es paar Stung lang güebt worde, u nid nume eini, wi's d Füürornig für d Muschterig het vorgschrive. D'Schluuchleitig het jede fix u fertig erstellt scho by sech gha u het se stungelang in Aktion bhalte. Aber wi meh dass isch glösche worde, wi höher isch ds Füür i ds Dach gstileti, dass es mängisch grad zglanzem het gläderet, u di füürige Manne hei zämegriiffe, bis se di zahme mit paarne Sprütz us de läderige Schlüüch ume hei usenagere ta.

Dä Chehr isch es aber du gar nid so strub ggange u gäge angeri Mal no zart abglüffe. Zwar ghelkt u ggüselet hei si enanger scho, d Dörfler u d Schattsyler u d Bärgler, wi's ja o zu jeder rächte Muschterig ghört het. U Trümpf u Müscherli sy hin u här gfloge, wi dieser, wo si z Brunscht gfahre sy, heige vergässe d Schlüüch mitznäh, oder äiner heige Strouseck u Dachbett süüberli zum bröönige Huus uus treit, aber derfür de ds Chachelgschiir u d Glasruschtig zum Fänschter uus gheit, u ds Gmeinsammes Därm, wo si dä Ranzebadli heige gmetzget gha, für Sprützschlüüch bbruucht, wil's ne wär z chöschtlig cho, läderig z chouffe. U dis u äis u süsch no mängs bis uf tuusig u ume zrugg.

So isch dasmal nume im Fride zangget worde, u nachär hei di Manne gäge Morge ane o fridlech ihrer Bränd u Tägle hei treit.

U wo Bode-Chlous am nächsche Vormittag d Füürsprützeredli für a d Bänne sälber isch ga umereiche, für öppe de angäds chönne Härd z füere, het er im «Löie» ohni angers no mit paarne Sprütze müesse ga fertig lösche, will äbe sy Brand gäng no chly gmottet het.

## WETTBEWERB

### Fachausdrücke der alten Buchdruckerkunst

Auch heute noch empfindet man es als unschön, wenn eine Seite oder eine Spalte mit der Ausgangszeile eines Absatzes beginnt. Die Fachleute hatten einen drastischen Ausdruck dafür; sie nannten die Zeile *Huren-kind*.

Siehe Wettbewerbsfragen auf Seite 101